

però messeno che tal gratia li sia concessa. Fu presa. Ave: 167, 15, 5.

In questo zorno, poi disnar, el signor duca Alfonso de Ferrara con soi fioli don Ippolito arziopiscopo de Milan et don Francesco, se parliro de qui per tornar a Ferrara in le sue barche longe, vuogano 10 remi per banda, sono alte et portano felze. Et il suo orator in questa matina fo in Collegio a avisar el Serenissimo come el suo signor se partiria hozi, come el fece.

83 *A di 10.* La matina, fo letto in Collegio una *letera particular, di sier Donado Dolfin podestà di Budua, di . . . , che scrive a sier Alvise Bembo fo di sier Vincenzo.* Et li avisa questa presa di le do galle. Et la copia sarà qui avanti.

Veneno li proveditori a le biave, sier Hironimo Querini, sier Piero Bragadin proveditori sora le biave, dicendo voleno far provision et comprar biave et altro aziò questa terra non habbi penuria de biave, le qual valeno al presente lire 10, soldi... el staro, et è stà comenzà a tajar li orzi et segale, etiam de formenti, et voriano meter una tansa per formenti, alcuni voriano a restituir dil trato de formenti, altri meterla al Monte novissimo, ma bisogna trovar el don nel Conseio di X con la Zonta. Et questa matina fo publicà la parte presa in Conseio di X con la Zonta, zerca quei compra biave non tajade.

Et sier Gabriel Venier, sier Giacomo Duodo, sier Francesco Soranzo priori de la Scuola dil *Corpus Domini*, havendo mandà a dir a li frati de S. Domenego poi disnar venisseno iusta el solito el zorno dil Corpo de Christo a far la procession, risposeno non voler venir, unde andono dal Serenissimo a dolerse, i quali se doleno che questo Serenissimo li mandò dal legato et il legato li mandò a dir venisseno, li qual frati risposeno non voriano venir se soa signoria reverendissima non li comandasseno, per il che il legato vene questa matina in Collegio a dimandar quello havesse a far, et per tuto el Collegio li fo dito che questa è stata bona occasion a retrar essi frati dil prefato monasterio et che i non andasseno, et ordinà far la procession *solum* con li preti.

Fono fati li capi de archibusieri 40 per uno su le galle de Barbaria, con ducati 15 al mexe per uno et le spexe, et darti . . . page al presente et a li archibusieri ducati 3. Rimaseno tre, stati contestabili, videlicet Gatin da Bologna, Zuan Antonio da Valle et Fantin Zen fo fiol natural de sier Tomà el cavalier. Et ordinà far hozi Pregadi, et poi Conseio

di X con la Zonta, per trovar ducati 1100 per expedir li archibusieri.

Veneno li oratori de la comunità de Verona, uno di qual è partido che è il conte Bonifacio de Sambonifacio, et richieseno certa confirmation de una parte presa nel loro Conseio zerca dar più pena a quei zurano el falso. *Item*, voriano che la Tomba, loco de amorbatì non pagasseno l'imprestado dil clero.

Vene l'orator dil duca de Ferrara, dicendo el suo signor heri esser partido per tornar a Ferrara, et havia a lui orator dato licentia de andar a Ferrara per qualche zorno et poi tornar. El qual partiria fatta la procession dil corpo de Cristo.

*Di Budua, di sier Donà Dolfin podestà, di 30 Mazo, scritte a suo cugnado sier Antonio Arimondo fo di sier Antonio:*

Missier Antonio quanto fratello carissimo.

Vi aviso hozi che son a di 30 mazo è zonto de qui uno bregantin dil proveditor de l'armada, li qual li ha exposto che hozi a otto zorni el capitano dil Golfo fo asallato da 11 fuste moresche, adeo che la galia dil capitano del Golfo, insieme con la galia bastarda patron missier Marco Corner *da Santa Margarita*, investiteno dentro, et tre altre galle che era in compagnia fuziteno ad alto mar; adeo che l'dito capitano insieme con la galia bastarda furòno presi, unde visto missier Hironimo da Canal che era venuta la nova de dita preda, insieme con 12 galle sono andati driedo; non so quel seguirà. Su la qual era Gasparo Spineli che andava canzelier in Cipro con sua moier, di le belle done de Venexia. Vi prego andate a trovar missier Hironimo Celsi et dizeteli da parte mia come suo fiol Giacomo che era nobile con el dito capitano che era restato a Liesna amalato et che 4 zorni avanti sia intervenuto questo caso l'era stato qui a tuor 4266 lire de biscoto, et che li so dir zerto che so fiol era come vi dico a Liesna amalato, perchè io ho domandato de lui al sopra masser dil capitano del Golfo.

Da poi disnar, fo Pregadi, chiamato per trar la materia de possessi di vescoadi, et il Collegio vol darli, fo leto quela letera de Budua soprascrita, et dil proveditor Canal di 10 mazo et di Corfù di 30 april vechie notade de sopra.

Fu leto una suplication di Zuan Giacomo di Pantalón, qual tolse el governo dil dazio de le frute, per il che miorò, che fu poi ben afitado, et non è stà remunerato, dimanda de grazia fanti a li Pro-